

Wulf Wagers wunderliche Weltbetrachtung

Lokus Pokus em All

Wenn bei ons irgendwo a Scheißheisle vrstopft isch, no rufat mr halt dr Rohr-frei-Dienscht an, zahlat an Haufa Geld, kennat anschließend wieder en Haufa macha ond ällerhand Wässerla drzua. Wenn de aber auf ra Raumstation em Orbit omanandr flieagsch ond do bassiert des Gleiche, no isch des a ganz schee beschissene Situation. Denn für da fliegende Rohr-frei-Dienscht hot sich bisher mangels Auftråg no koi Ich-AG als Geschäftsmodell entschieda.

Jetzt hockat se do oba en dr internationala Raumstation ISS in ra Scheiß-Situation. Zwar isch am Samschdag dui Raumfähre Discovery zur ISS g'startet, aber dia war scho überbucht ond



hot au koi Ersatzklo oder gar Klemmner-Werkzeug mitnemma kenna. Jetzt funkat dia Aschdronauta ständig „Houston, wir haben ein Problem!“ Jetzt sott ma jo moina, dass von dera Aschdronaudanahrung en Tuba net grad viel ibrig bleibt, aber des isch z' kurz denkt. Ebbes bleibt emmr ibrig, was raus muass. Mir dohonna uf dr Erde dädat halt gschwend irgendwo hendr an Fliederboscha hocka ond onser Gschäft macha. Abr jetzt fend amol do doba em All en Flieder oder irgend en andera Boscha. So en Scheiß!
Bis näggschd Woch'

Ihr

Wulf Wager